

**Date – 27/02/2025**

**Time - 7:30 -7:40Hrs**

**REGIONAL NEWS BULLETIN**

**HEADLINES (MORNING)**

- 1. Chief Minister Pu Lalduhoma leh Dr. Vinod Kumar Paul, NITI Aayog Member te nimin khan Aijal Club ah an inkawm.
- 2. Mizoram Sorkar chuan 'bana kaih' ruahmanna atan SIDBI nen Thawhlelni khan thawhhona thuthlung Memorandum of Agreement a ziaak.
- 3. Bihar-a Nitish Kumar-a kaihhruai sawrkarah minister thra 7 lakluh an ni.
- 4. Sudan-a Omdurman khawpuia sipai thlawhna tla avanga chhiatna thlengah mi 46 an thi.



**NITI AAYOG**

Chief Minister Pu Lalduhoma leh Dr. Vinod Kumar Paul, NITI Aayog Member te nimin khan Aijal Club ah inkawmin Mizoram sawrkar Council of Ministers, official pawimawh leh NITI Aayog officials pawimawi te an tel.

Chief Minister chuan Mizoram sawrkarin Handholding Scheme a kalpui dan leh healthcare lama a hmachhawp te a hrilh a.

Dr. VK Paul chuan, NITI Aayog chuan ram hmasawinna nghet nei tur leh Viksit Bharat 2047 tihlawhtling turin, ngaihtuahna thar (new idea) ngaihlu zel chungin hma kan la a. Hmachhawp fel tak leh tum fel tak neiin ke a pen mek a ti a. Mizoram chu kum hnih chhung India rama Infant Mortality Rate hniam ber a ni tawh a, hei hi thil lawmawm leh hmasawinna chhinchhiahtlak a ni, a tiin, eawtna leh ngenna an thlen te chu a theih ang anga a lo bawhzui tur thu a tarlang.

NITI Aayog official ten kawng hrang hranga an hmalakna sawifiahna an nei a. State Support Missions an kalpui dan te, digital transformation lama hmalakna te, Aspirational district kalpui dan te, Data Analytical Unit an kalpui dan te, Atal Innovation Mission an kalpui dan te, he mi lama state leh UT te an thawhpuina State Innovation Missions chungchang te, Skills & Women Empowerment lama an hmalakna te, Health & Nutrition lama an hmalakna te leh thil dang te an sawifiah a. Mizorama hma lak dan tur rawtna an neih te pawh an tarlang.

Pu Lalmalsawma Pachuau, Secretary, Planning & Programme Implementation chuan Sustainable development leh Viksit Bharat 2047 thlentir tuma Mizoram

sawrkar hmalakna hrang hrang sawifiahna a nei ve bawk. Chu mi hnuah kal khawmten sawihona hun an nei zui a ni.

Vawiin hian hian Mizoram University-ah India hmarchhaka NITI Aayog-in Women Empowerment Programme (WEP) hma an lakna bul an tan ang a. Workshop an buatsaih ang.

(DIPR)

<><><>

NITI AAYOG MEMBER

NITI Aayog member Dr Vinod Kumar Paul chuan natna hmuhchhuah hma hi hriselna lam leh damlo enkawlna atana thil pawimawh tawpkhawk a ni, a ti.

Zoram Medical College & Hospital-in an hnathawh an enletna hun hmanpui-in zan khat riaka Mizorama rawn zin NITI Aayog member chuan hriselna kawnga thawhna chuan mitin a thleng pha tur a ni a, chu mi atan chuan primary health centre te, wellness centre te leh health sub centre te tihchangtluna thuam that a ngai a ni a ti. Mipui hriselna lam atana thawktute chu kum 3 emaw kum 4 chhung vela ngawr natna, sikserh, phar natna, German sentut (rubella) leh sentut (measles) te tibo tura nasa leh zuala tan la turin a sawm a ni.

He inkhawmah hian Health Minister Pi Lalrinpuii, Principal Economic Director Anna Roy, NEC Economic Advisor Sherry Lalthangzo te an tel a. ZMC&H thuneitute chuan Dr. Paul hnenah hian an mamawh hrang hrangte an lo thlen a. Chu'ng zingah chuan kum 2025-2026 session chhunga Master of Medicine leh Master of Surgery class hawn phalnate, Mizorama doctor indaih lohna sutkianta a tel a. Ministry of Health & Family Welfare a ZMC&H tihchangtlunna atana cheng vaibelchhe 313 leh nuai 84 dil mek pek chhuah thuai ni se an duh thute an sawi bawk a ni.

(Desk)

<><><>

CBC

Ministry of Information & Broadcasting hnuai Central Bureau of Communication, Field Office, Aizawl chuan nimin khan Aizawl district-a Muthi khua YMA Hall-ah Viksit Bharat chungchangah ni khat awh Special Outreach Programme buatsaih a ni.

He hunah hian Lalginlen Lhouvum, Central Bureau of Communication Field Office, Aizawl In-charge chuan Central Bureau of Communication hmathlir te leh outreach program hmanga mipui hnena information pek hmangin sorkar programme leh scheme hrang hrang-a hamthatna leh hlawkpuina an dawn leh an hmuh theih thu a sawi a ni.

Resource Person, Kaphmingthanga, VCP hlui, Muthi leh CSC Muthi te chuan Viksit Bharat hnuai flagship scheme leh policy hrang hrang hmangin mipui pungkhawmte hrilhhriatna a neih bakah PM Vishwakarma chungchang pawh sawi lan niin kalkhawmte heng scheme hrang hrang-ah hian inziaklut turin a fuih a ni. Programme-a tel te hnenah hian hriatrengna thilpek leh lawmman pek tel an ni bawk.

(Desk)

<><><>



**MOA ON CREDIT**

Mizoram Sorkar chuan 'bana kaih' ruahmanna atan Credit Guarantee Fund Trust for Micro and Small Enterprises scheme chungchangah SIDBI nen Thawhlelni khan thawhhona thuthlung Memorandum of Agreement a ziaak.

He inremna hi Mizoram State Policy Coordination Committee Vice Chairman Dr. KC Lalmalsawmzauva hriatpui-in Commissioner and Secretary, Commerce & Industries Pu Lalzirmawia Chhangte leh CGTMSE CEO Pu Manish Sinha ten an ziaak a ni.

CGTMSE hi Sorkar laipuaia Ministry of Micro, Small & Medium Enterprises (MSME) leh Small Industries Development Bank of India (SIDBI) in thil siamchhuahna leh sawngbawlna pek kaihhnaih eizawnna hrang hrang, lian tham si lo te'n an hmalakna atana sum mamawh phuhruk tura awlsam zawka loan an lak theih na'n a ruahman leh kalpui a ni a. CGTMSE hnuaiah hian MSME loan la te chu an loan lak atanga za zela 75 atanga 85 thleng guarantee pek sak a ni thin a; hemi atan hian loan la tu in fee a chawi a ngai thin. Bank lam tan risk a la san deuh avangin loan dilna tam tak hnawl a lo ni tawh thin a. SIDBI nena Mizoram sawrkar inremna hnuaiah hian Mizoram Bana Kaih ruahmanna atangin za zela 95 thleng guarantee tih san a nih dawn bakah Mizoram sawrkar chuan Guarantee fee a tum sak vek dawn avangin dahkham leh guarantor ngai lovin awlsam zawkin loan a lak theih dawn niin sorkar thuchhuah chuan a tarlang.

MSPCC Vice Chairman Dr. KC Lalmalsawmzauva chuan nimina inremna ziah naah hian Progress Partner-te bana kaihna tur hian Mizoram sawrkar chuan loan rul tha te chu loan pung an rulhna a rul let zel tur thu a sawi. MoA ziahnaah hian Partner Bank - State Bank of India, Mizoram Rural Bank, Mizoram Cooperative Apex Bank leh Finance Department aiawh te bakah Bana Kaih ruahmanna hnuaia Nodal Officer te a tel a ni.

**(DIPR)**

<><><>

**POOR FEDERATION**

Mizoram Poor Federation chuan khawtinah miretheite'n an chanvo tur dik tak changa, an sum lakluh ang zela an awmna tur theuh Ration Card-ah an awm theihna'n hmalak an tum

He thu hi nimin khan Aizawl Press Club-ah Mizoram Poor Federation hruaitute chuan chanchinbumite an kawmna-ah sawiin, Mizoram Poor Federation President Pu Lawmthanga chuan Supply Minister Pu B Lalchanzova pawh hemi chungchang hi lo sawipui tawh thu leh amah leh sorkar tawiawm tura sawmna an dawn angin Champhai District-ah bul tanin mirethei ten an chanvo tur dik tak Ration Card-ah an awm ngei em tih finfiah turin an che chhuak dawn tih a sawi a ni.

Pu Lawmthanga chuan khawsakna dinhmun a zira Ration Card eng emaw a pawla awm tur ni si, Ration Card vara awmte leh Ration Card vara awm tur ni tawh awm tak Ration Card eng/pawla awmte pawh an la awm thei niin a sawi a. Mipui-in an sum lakluh leh khawsak dinhmun ang zela an nihna dik tak Ration Card an neih hi a thianghlim a, khawsak dinhmun a zira Card eng/pawl atanga Card vara insawn hian Mi harsa zawkte tan hmun an kian tih hriat a tul thu a sawi a ni.

Ration buhfai dahna buara chungchangah sawrkarin hma thar la-in, ration buhfai latu ten buhfai an lak zat tur dik tak leh buktling ngeia an lak theih na'n kudamah Buara rihna gram 580 hi an paih nghal a. Retailer-in buara rihna hi buhfai atangin an Cut a

rem tawh lo a, buhfai latu ten buhfai an lak tur zat dik tak leh buk tling an lak theih nan sorkarin ruahmanna a siam hi a tul dan ang zelin an bawhzui dawn tih an sawi bawk a ni.

(Corr)

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.  
Vawiin chawhnu dar 2 leh a chanve-ah Chanchinthar hi puan leh a ni ang.

<><><>

BIHAR

Bihar-a Nitish Kumar-a kaihhruai sawrkarah minister thra 7 lakluh an ni. Governor Arif Mohammed Khan chuan nimin khan BJP MLA pasarihte chu Patna-a Raj Bhavan-ah rinawmna thu tiamtirin minister atan a lalut a. Minister lakluhte hi Sanjay Saraogi, Krishna Kumar Mantu, Dr Sunil Kumar, Motilal Prasad, Raju Kumar Singh, Vijay Kumar Mandal leh Jibesh Kumar te an ni. Heti hian Nitish Kumar-a cabinet ah hian Minister 36 an awm tawh a ni.  
Bihar-ah hian kuminah Assembly inthlan neih a ni ang.

(Newsonair)

<><><>

MAHA KUMBH

Khawvela sakhaw thila intawhkhawm lian ber Maha Kumbh chu nimin khan Prayagraj ah khar a ni. Ramchhung hmun hrang hrang atanga sakhaw biakzina kalten Sangam ah an inchiah thianghlim a ni. Maha Kumbh Mela hi January ni 13 atang khan tan a ni a. Kar ruk chhungin mi vaibelchhe 64 leh nuai 60 chuanguin Mahakumbh hi an tlawh a. Khawvela mihring punkhawmna lian ber a ni.

(Newsonair)

<><><>

PRASAR BHARATI.

Prasar Bharati Chariman Navneet Sehgal chuan Akashvani chuan ramchung mipuite hnam ziarang leh nunphung inhriattawnna leh inpawh tlannaah a thawh hlawk hle a ti. Nimina Mahakumbh tawp nia a thuchahah Pu Sehgal-a chuan ni 48 an tihchhuah chhungin Akashvani Kumbhvani chuan mi tam tak nun a khawih a ni a ti.

(Byte)

Prasar Bharati CEO Gaurav Dwivedi pahwin Akashvani Kumbwani channel chuan Mahakumbh chanchin tihchhuah kawngah an thawk tha hle a ti a. Akashvani chuan mipuite hnena thu leh hla thehdarhtu a nihna chu tlin takin a thawk a ti a. Mahakumbh chuan mipuite nuna thil tam tak a khawih tih sawiin mi thinlungah a chang thuk em em a ni a ti bawk.

(Byte)

(Newsonair)

<><><>

SUDAN

Sudan-a Omdurman khawpuia sipai thlawhna tla avanga chhiatna thlengah mi 46 an thi. Thudawn danin Antonov aircraft chu nimin khan Wadi Sayidna air base atanga a thlawh chhuah hnu lawkah a chesual a. Sipaite chuan thlawhna khawl fel loh avanga chhiatna hi thleng niin an sawi a. Thlawhna tlakna hi civil mite awmna hmun anih avangin mitthi zingah hian civil mi engemawzat an tel nia thudawn a ni.

(Newsonair)

<><><>